

պահեաց առ իւր • և զկնի աւուրց ինչ ել և գնաց 'ի Բեթղեհէմ առեալ ընդ իւր զՅովհաննէս արեղայն, զԿարապետ սարկաւազ և զՅարութիւն սպասաւորն • և և անտի նոքօք հանդերձ դէմ եղեալ գնաց յԵգիպտոս, ('ի 21 Հոկտեմբերի) :

Եկնիչէրիք Երուսաղէմի 'ի ժամանակէ հետէ սպստամբեալ և տիրեալ էին ամրոցի քաղաքին, և ծանրացեալ յոյժ 'ի վերայ բնակչաց իշխէին նոցա և դատէին զդատաստան • իսկ Ապտուլլահ Փաշայ, որ նստէր յԱքքէ, հրամանաւ Թագաւորին առաքեաց 'ի վերայ նոցա զՔեահեայ իւր բազմութեամբ զօրաց, և պաշարեցաւ քաղաքն, և տեւեաց պատերազմն աւուրս իբրեւ 15, այլ քաղաքին և բնակչաց չեղեւ ինչ վնաս, զի մարտն ընդ ամրոցին էր, յոր ձգէին արտաքուստ զհրանօթս: Զօրավարն զգօնամիտ Թողեալ զմարտն կոչեաց առ ինքն զմեծամեծս քաղաքին և 'ի ձեռն նոցա նուաճեաց զսպստամբսն և տիրեաց բերդին, և զգլխաւորս նոցա առաքեաց առ Բզեչլան, և նորա պատուեալ զնոսա դարձոյց վերստին յԵրուսաղէմ • այլ նոքա անկեալ 'ի կասկածանս՝ բազումք 'ի նոցանէ խոյս ետուն անտի 'ի Քերրոն և յԵգիպտոս: Եւ զօրավարն յանձն արարեալ զբերդն Քաղաքապետին, որ կարգեալ էր 'ի կուսակալէն Գամասիոսի, դարձ արար անդրէն յԱքքէ: Նուազութիւն հացի յԵրուսաղէմ, շափ ցորենոյ (36 օքա) վաճառէր 60 դահեկանի, և և այն հազուադիւտ, նոյնպէս իմա և զայլ վաճառս, (1826 • 'ի 25 Հոկտեմբերի) :

Պատմեցաք յառաջագոյն համառօտիւ զանցս Յակոբ վարդապետի և ընկերաց նորին, ուղեւորելոց յԵթովպիա • զկնի վերադարձի նոցին, եկին անտի յամսեանն Սեպտեմբերի անձինք 2, մին քրիստոնեայ Գէորգ անուն, և միւսն մահմետական հաճի Մէհէմէտ՝ գրով Թագաւորի իւրեանց առ մեծազօր փոխարքայն Եգիպտոսի Մէհէմէտ Ալի, թէ յառաջ քան զայս վարդապետ ոմն յազգէ Հայոց կամելով զալ 'ի մեր Տէրութիւն, անկեալ է 'ի ձեռս ապստամբելոյ 'ի մէնջ Բզեչլիին Ատվայու, և 'ի մէնջ աքսորեալ Ղպթոց եպիսկոպոսին, զոր անարգութեամբ արտաքսեալ են անտի: Վասն որոյ խնդրեմք 'ի ձէնջ կամ զնոյն վարդապետ կամ զայլ ոմն 'ի Հայոց ազգէ անպատճառ առաքեսցես